



EUR VAM HAG HE BUGEL.

War don : Ni ho sañd , Stereden tñr.

Doue Gralon ha Guenole ,
Taolit eur zel a drugare
War va bugel nevez ganet ,
Evit ma ho karo bepret !!!

Deoc'h her gwestlan , ô va Doue !
Da Werc'hez Remengol ive !
Hi eo Rouanez ar bed Oll ,
Hag a viro n'he dai da goll.

Va mabik , va elik Doue ,
Va elik dous , va c'harante ,
Te a so koant enn da gavel ,
Koant ha laouen evel eun el !

Ar vuez mâ a zo c'huero ,
Karget a boan hag a zaelo !
Doue roi dit , va bugel paour ,
Feiz , esperans , eur galon aour !

Eur galon aour ha karantez
Da dremen leal da vuez !
Ra vi bepret karantezus
Vel ma oa ar mabik Jesus !

Petra vezi war ar bed ma ?
Evel da dad enn den a boan !
Marteze vi barz pe beleg ,
Soudard , martolod pe tieg !

Doue hep ken oar ann dra-ze ,
Ha ra vo gret he volonte !
Er joasted hag enn anken ,
Te a vo fidel d'he lezen.

Dindan ar walen a gasti
Plega alies a renki :
Ann eurusdet na gaver ket
E-pad ar vuez war ar bed !

Kemer da boan a galon vad ;
C'hoars ha dour enn da zaoulagad ,
Pa deui ann deiz ma vi skoed
Gant ann anken ha treid ar bed.

Pa vi gant ann holl dilezet ,
Pa vo da galon paour mantret ,
Beuzet enn eur môr a c'hlaç'har ,
Sell va mab , sell Mene-Kalvar !

Kousk ase brao , c'hoaz out bihan ,
N'ouzout ked c'hoaz petra eo poan ,
D'az c'hoad e ver er baradoz !...
Ann den a oar-ze pa ve koz.

Kar da vam , va elik Doue ,
Mervel evidout a rafe !...
Enn he c'hozni , enn e foanio !
Va mab , te zec'ho he daelo.

Pa vezi bras , hi a vo kôz !
Pa vo maro , evit repoz ,
Laka he c'horf enn disheol
Enn bered santel Remengol !

Kar ha ped ann aotrou Doue ,
He vignonet sent Breiz ive !
Kar ha ped Gwerc'hez Remengol ,
Ha birviken ne di da goll.

I.-P.-M. AR SCOUR,

BARZ I.-V. REMENGOL.



ANN DURZUNEL BAOUR

HAG

AR SPARFEL FISTOULIK.

« Neb na zent ked ouz ar stür,
» Ouz ar garrek a rai zür. »

War don : *Pen-Herez Keroulas.*

Eul labous koant , eunn durzunel ,
Ganet e koajoù Breiz-Izel ,
A gavaz mad kuitaat he neiz
Evit mont pell , pell euz a Vreiz.

Er Ponthou e oa eur sparfel ,
Koz , sod , divez ha farouel ,
Enn he gozni ne furee tamm ,
Kanfart e oa a neve-flamm.

Ar sparfel-ze fistoul , traitour ,
D'ann durzunel a ra beg flour ;
Ann durzunel baour a grede
E oa ar sparfel he Doue.

He far a lavaraz d'ez-hi :

- « Aman e vevez dizoursi ;
- « Aman gant da vignon fidel ,
- « Eo brao beva , vo dous mervel.

- « Pell diouz da neiz , ar ienien ,
- « Ann naon , ar zec'hed , ann anken ,
- « Ar glao , ann erc'h hag ar glac'har ,
- « Vo da loden war ann douar.

- « Da vignon traitour ar sparfel ,
- « Enn noaz az lezo da vervel !...
- « Mervel a zo eunn dra c'huero ,
- « Pa varver pell , pell diouz ar vro !...

- « Aman gan-i-me chomm ato.
- « Va askellik da ziwallo ;
- « Da neizik flour vo tomm bepret ,
- « Ha gant da bar e vi karet.

- « Evel ann eostik er c'hoajou ,
- « Me a gano d'id va zoniou ;
- « Ha dre bevar c'horn Breiz-Izel
- « Te vo ar goanta turzunel. »

Hag ann durzunel digalon
A gimiadaz ouz he mignon ,
Evit mont da heul ar sparfel
Pell diouz he neiz ha Breiz-Izel.

Likit evez , turzunellik ,
Ar sparfel zo eur fistoulik !...
Er broiou all ne gefot ket
Eunn neiz , eur mignon d'ho karet.

Ann durzunel e deuz ankouet
He neiz hag he far glac'haret ;
Ha d'ar sparfel gant follentez
E deuz roet he c'harantez.

Allas ! ne oa ket red mont pell
Evit anaout mad ar sparfel ;
Ar sparfel zo bet didruez
E kenver ann durzunel gez.

Pa oent erru dreist Mene-Bre ,
Ann taol pao kenta e devoe ,
Hag araog mont er meaz a Vreiz ,
E teu da zontal epp he neiz !!!

Meur a daol beg e deuz tapet
Allaz ! evit bea re garet....
Eleac'h soniou he dousik koant,
E deuz brema toliou dre gant.

Ar sparfel 'n deuz he mac'hagnet,
Er vouillen en deuz he sklabeet,
Enn eur c'hoarzin, laraz d'ez-hi :
Kerz brema gant nep a gari !...

He c'horf karget a c'houlou,
He c'halon karget a boaniou,
Ha beuzet holl enn he glac'har,
E sonjaz neuze enn he far.

« Va far, mignon karantezuz,
« Am euz lakeet ken maluruz,
« Ma welfez penoz ar sparfel
« En deuz sklabeet da durzunel !!!

Ann durzunel dizenoret,
Gant poan ann hent e deuz bet gret,
Da vont tre beteg he neizik,
Evit gwelet c'hoaz he c'hoantik.

E c'harz ann neiz pa 'n em gavaz,
He c'halonik paour a rannaz,
Pa welaz maro he mignon,
Maro, siouas ! gant rann-galon !!!

KELENNADUREZ.

Mere'hed iaouank a Vreiz-Izel,
Lakit evez ouz ar sparfel....
Pedit Doue n'eot ket da goll,
Ha pedit gwerc'hez Remengol !!!

I.-P.-M. AR SKOUR,

EABZ I.-V. REMENGOL.



MEZ ANN DUD.

AR MILIONER FALS PINVIDIK.

War don : Gourc'hemennou Doue.

Horesco referens.

Ha te, tousek koz, mez ann dud,
Milioner, hervez ar brud,
Dastum 'ta madou, bern war vern,
Mez ann dud, mont 'ri d'ann ifern.

Bed oud a viskoaz eur ribler ,
Rag-ze oud deut milioner.
Dastum 'ta etc.

Biskoaz ne c'heuz bet eur mignon ,
Rag n'oud ket eun den a galon.
Dastum 'ta etc.

E Breiz ann dud , braz ha bihan ,
A lavar ez oud eur pagan.
Dastum 'ta etc.

Da deot lous a zo binimus ,
'Vel ann aer viber oud flemmus.
Dastum 'ta etc.

Biskoaz ne c'heuz great aluzen ,
D'ann dud ezomek , d'ar beorien.
Dastum 'ta etc.

War ar paour e toull dor da di
Didrue , c'heus hiset da ghi.
Dastum 'ta etc.

Gwerzet c'heuz ar sent ha Doue
Ha flipet arc'hant evit-he !!!...
Dastum 'ta etc.

Madou diwar goust iliziou ,
Ia da houarna ann diaoulou (1).
Dastum 'ta etc.

Peurlipet c'heuz diner ar paour ,
'Vit peurgarga da ialc'had aour.
Dastum 'ta etc.

Goad ar paour kez e c'heuz sunet
Ha gant ann naon eo bet marvet.
Dastum 'ta etc.

He vreg hag he vugaligo
Zo gant ann naon ive maro.
Dastum 'ta etc.

Kreiz ar goanv , enn noz , int maro ,
Enn noaz , war eun dornad kolo.
Dastum 'ta etc.

Da vintin , war dour Remengol ,
Oa gwelet GWERC'HEZ REMED HOLL.
Dastum 'ta etc.

(1) Ann dud koz e Breiz a lavare , hag ann dra-ze a zo gwir : « Ar pezh
« a deu digant ann diaoul a ia d'enn houarna , ha c'hoaz e chom eun troad
« d'erzhan dishouarna. »

'Tiguemer he bugaligou ,
'Vit ho c'has gant-hi d'ann Envou.
Dastum 'ta etc.

Tre he divrec'h karantezuz ,
Deuz ho douget beteg Jezuz.
Dastum 'ta etc.

Mab Doue n'en doa ket eur meen ,
Evit harpa war-n-han he benn.
Dastum 'ta etc.

Jezuz , mestr ann env, ann douar ,
Zo maro war mene Kalvar.
Dastum 'ta etc.

Ha te , diskibl ann Doue-ze ,
Kenver ar paour oud didrue.
Dastum 'ta etc.

Ar paour , du gant ar baourente ,
Zo eur mignon braz da Zoue.
Dastum 'ta etc.

'Fals pinvidic gant he vadou ,
Zo mez ann dud , boed ann diaoulou.
Dastum 'ta etc.

Diwar goust ar paour ha Doue ,
Brema millioner oud-te.
Dastum 'ta etc.

Malloz ar paour , malloz Doue
Vo da viken war da ene.
Dastum 'ta etc.

A drugare Doue , oud koz
Hep dale pell e koei er foz.
Dastum 'ta etc.

Enn devez m'ha renki mervel ,
Vo joäusdet e Breiz-Izel.
Dastum 'ta etc.

Da heritourien a c'hoarzo ,
War da vez ann drein a zavo.
Dastum 'ta etc.

War da vez ann drein a zavo ,
Dour biniget , peden n'az po.
Dastum 'ta etc.

Dour biniget , peden n'az po ,
Hag ann diaoul da fistouliko.
Dastum 'ta etc.

I.-P.-M. AR SKOUR,
BARZ I.-V. REMENGOL.

Moulet e Montroulez, e ty J. HASLÉ. — 1864.